

Pilipai Lenji Leta Pol Le Rorori Utu iviva

Pol le vaghiliya theghewoniye e tine va i wa e ghembake iyake, Pilipai, ina Masedoniya ele valivannga. Pol le kaiwo na le vavaghare kaiwae gharighari vavana thi lonweghathi ko amba ekelesiya ina Pilipai e tine. (Hu thuweya Vakatha 16:11-40). Le vaghiliya theghetoniye e tine tembe ve thuwengiva ekelesiya Pilipai e tine (Vakatha 20:6). Va i ri gheko i wa Jerusalem, ko amba i wa Rom le kot kaiwae. Theghathagha umboiwo ve yaku e thiyoo Rom e tine. Ghayamoyamo ngoreiye va e mbanako iyako iyava i roriya letake iyake na i variye wengiya ekelesiya Pilipai e tine.

Pol le righe laghiye na i variya letake iyake kaiwae va nuwaiya i vata ago wengiya ekelesiya Pilipai e tine lenji mwaewo kaiwae, iyava thi variye weya amalaghiniye (1:15; 4:10-19). Pol tembe nuwaiyava i vavurighenghingi na thi gharenja (2:1-11), na ghanjithanavu ngoreiya ralonwelonweghathi ghanjithanavu. Ravavaghare vavana thinava thongo Pilipai mbe thi ghambu vara Mosese le Mbaro amba ne valikaiwae Loi i wovathovuthovuyenangi, ko iyemaenge Pol i worangiya wengi mbe ra lonweghathi enge Krai ambane Loi i worumwarumwarunainda (3:1-11). Iya kaiwae Pol

i vavurighhehengi na thi ndeghathi vurigheghe lonweghathi emunjoru moli e tine.

Renuwanja laghiye regha letake iyake e tine iye warari. Pol mbe ghamberegha vara le warari na le gharematuwo i govambwara, na i dage wenjiya Pilipai inja, “Mbanake wolaghiye hu warari, kaiwae kaero hu yaku weya Giya.”

¹ Ghino Pol ya roriya letake iyake weingu Timoti, ghime Krai Jisas le rakakaiwo, wo variye na i ghaona e ghemi ekelesiya Pilipai, weimiyangiya lemi randeviva na ghanjirathalavungi. Ghemi Loi le gharighari kaiwae kaero hu yaku weya Krai Jisas.

² Wo nanjo weya Loi Ramanda na ghanda Giya Jisas Krai gharenji e ghemi na lenji gharemalili i riyevanjara gharemina.

Pol i nanjo weya Loi Pilipai kaiwanji

³ Mbanake wolaghiye thonjo ya renuwana, ya vata ago weya lo Loi,

⁴ na mbanake wolaghiye thonjo ya nanjo taulaghina ghemi kaiwami, weingu lo warari ya nanjonanjo.

⁵ Lo warari righe kaiwae, i ri mbananiye va hu lonweghathi, weinguyangiya ghemi ra vethalathalavuinda na ra vakavakatha Toto Thovuye kaiwoniye gheghad noroke.

⁶ Na ya ghareghare wagiya kaiwoke thovuye iyake Loi iya kaerova i woraweya righe e yawalimina, mbene i vakatha valawe vara gheghad mbananiye Krai Jisas ne i njoghama.

⁷ Ghemi mbe gharenjo vara wenga mbanake wolaghiye, na i thovuye moli e ghino ya

renuwanja ngoreiyako kaiwami. Kaiwae othembe e mbanake inangu e thiyo tine na ya vamanjamanjalana Toto Thovuye wenjiya rathighiya buda kaiwae i emunjoru na ma e ghanumoghegheiwo, vambe weinguyangi vara ghemi ra vethalathalavuinda e kaiwoke iya Loi, weiyee le mwaewo va i wogiyake e ghino.

⁸ Loi i ghareghare, emunjoru moli mbe gharengu vara wenga taulaghina ghemi ngoreiya Krai Jisas i gharethovunga laghiye.

⁹ Ya nanjonango kaiwami na gharethovu thanavuniye mbe i mbuthumbuthu vara e yawalimina, na tembe ngoreiyeva Loi ghaghareghare i laghiye e gharemina na lemi renuwanja i rumwaru,

¹⁰ na mbala hu tuthi e thanavuke wolaghiye na iyanjaniya i thovuye moli hu vakavakatha. Mbala ma e lemi thari o e ghamiwonjowe regha mbanja Krai Jisas ne i njoghama.

¹¹ Thanavu thovuye moli une iye i mena weya Krai Jisas i riyevanjara gharemina, na iyake kaiwae gharighari thi yavwatatawana na thi tarawe Loi.

Pol ghangaringari i vakatha Toto Thovuye i voru

¹² Lo bodaboda, nuwanjuiya hu ghareghare, vuywoke iya thi yomarake e ghino i vakatha Toto Thovuye ma i voru enge.

¹³ Sisa ghayayao gharagatigat, weinjijangiya ghembako gharighariniyeko wolaghiye, kaero thi ghareghare Krai kaiwae iya ya ruke e thiyo.

¹⁴ Na reghava, lo ru e thiyoke i vakathangiya oghaghanda lemoyo lenji lonweghathi weya

Giya kaero i vavurigheghe, na weinji lenji gharematuwa, ma thi mararu thi ndethina Loi utuutuniye.

¹⁵ Ngoreiye, gharighari vavana thi yamwanja kaiwanju na nuwanjiya thi kivwalango na thi vavagharena Krai utuutuniye, ko vavana thi warari enge kaiwanju na thi vavaghare.

¹⁶ Thiyeke iyake lo ru e thiyo une i yomara gharighari lemoyo thi ghareghare Toto Thovuye emunjoru, iya kaiwae thi gharethovungo na thi vavagharena Krai.

¹⁷ Ko thiya vavanama, ma renuwana thovuye e tine na thi vavaghare. Thi utuna Krai utuniye kaiwae nuwanjiya thi wovorena idanji na thi kivwalango, na thi munjeva thi vatabo wovuy-owoke mbanja amba inanguke e thiyo tine.

¹⁸ Ko e ghino ma bigi ngoreiye, ya warari enge. Othembe thongo lenji renuwana i thovuye o lenji renuwana i thari e ghino, Krai utuniye iya thi utunako, iyako kaiwae ya warari moli.

Mbwana, lo warari mbene i tubwembele vara,

¹⁹ kaiwae ya ghareghare lemi nangona une na Jisas Krai Une le thalavu kaiwae Loi ne i rakayathungo na ya rangi e thiyoke tine.

²⁰ Lo renuwana e gharenguke laghiye mane ya monjinana bigi regha, ko mbanake wolaghiye na mbe e mbanakeva iyake weingu lo gharematuwa na lo vakathake wolaghiye e tinenji ya wovavwenyevwenyena Krai, othembe ne riwangu i thovuye o ya mare.

²¹ Iya kaiwae, e ghino thongo riwangu thovuye, Krai kaiwaya iyako. Na thongo ya mare, kaero ne ya thovuye moli.

22 Ko thonjo mane ya mare, valikaiwae ne ya kaiwo na une ve yomara. Iya kaiwae ma ya ghareghare iyanganinya ne ya tuthi.

23 Renuwana theghewo thi momodingo. Nuwanguke nuwaiya moli ya iteta yawalike iyake na va yaku weingu Krai. I thovuye moliya iyako.

24 Ko ghemi ghamithalavu kaiwae valikaiwae moli mbowo ya yaku e yambaneke.

25 Ya ghareghare wagiawe wokaiwo mbe inawe, na ya ghareghare mbowo ya yaku e yambaneke weinguyangiya ghemi na ya thalavunga lemi lonweghathina i vurigheghe na hu warari.

26 Na mbanja ne ya njoghaona e ghemi lemi warari i laghiye moli weya Krai Jisas ghino kaiwangu.

27 Bigi laghiye regha iyake: yawalimina ghalongalonga hu njimbukiki vakatha na ngoreiya Krai utuniye thovuye le worangiya. Na othembe thonjo ya ghaona ya thuwenga, o ya bwagabwaga moli e ghemi na mbema ya lonwenge utunimi, ne ya ghareghare lemi renuwana regha hu ndeghathi vurigheghewe, na hu rovurigheghe na regha hu vakathangiya gharighari thi lonweghathigha Toto Thovuye.

28 Iya kaiwae thava hu mararangiya ghamithighiya. Thonjo hu vakatha ngoreiyako, ghamithighiyangi ne thi ghareghare ma e lenji vurigheghe na nevole i mukuwongi, na ne thi ghareghare ghemi hu vaidiya ghamivamoru kaiwae Loi i thalavunga.

29 Hu ndeghathi vurigheghe kaiwae Loi i vatomwe na hu kaiwo Krai kaiwae. Ma

mbe i vatomwenge na hu lonweghathigha amalaghiniye, ko tembe ngoreiyeva ne hu vaidiya vuyowo amalaghiniye kaiwae.

³⁰ Kaerova hu thuwengo ya rogaithi, e mbanake iyake hu lonweya utuningu mbe ghinoke ya rorogaithi. Rogaithiniye mbe reghaenge ghemi tembe hu rorogaithiweva.

2

Ra gharenja ngoreiye Krai

¹ Thongo kaiwae kaero hu tubwe weya Krai na i vakatha i mwanavairinga e yawalimina, thongo le gharethovu i yebubunga, thongo hu wo Une na lemi vighathi thovuye, na thongo gharemi wenjiya ghandane,

² kaiwae iyake emunjoru wo hu vakatha na lo warari i laghiye e lemi renuwana regha, hu vegharethovu wenga, e unemina regha na lemi ghamba ndegathi regha.

³ Thava lemi renuwana hu munjeva mbe ghemienge lemi renuwana nuwaiya hu vakatha o nuwamiya hu wovorenga, ko iyemaenge weimi lemi gharenja wenjiya ghamunena na hu wovorengi, ghemi thava.

⁴ Thava ghemi regha i renuwana na i munjeva i kaiwo ghamberegha le thovuye kaiwae, ko iyemaenge ghamunena lenji thovuye kaiwae hu kaiwo.

⁵ Hu wo renuwana iyake, iye Krai Jisas le renuwana. Ngoreiya iyake:

⁶ Iye mbanake wolaghiye mbe ngoreiye vara Loi, ko iyemaenge mava i rovirigheghe

- na mbala mboromboro weiye Loi.
- ⁷ Ko iyemaenḡe i tabo bigi bwagabwaga,
iye i tabo na ḡgoreiye rakakaiwo na i wo
lolo ghayamoyamo.
- ⁸ I yomara ḡgoreiye lolo,
na tembe ghamberegha i wonjaniya,
I ghambughā Loi le utu gheghad i wa le mare
kaiwae,
othembe mare e kros vwatae.
- ⁹ Iyako kaiwae Loi i wovoreḡa e ghamba yaku
yavoro moli,
na idako iya i kiwala idake wolaghīye i rena
idaewe.
- ¹⁰ Mbala rameburuburu,
rameyambane, na thavala thi yayaku
Thambe
thi ronja e ghenji vuvuye
Jisas idae ghayavwatata kaiwae,
- ¹¹ na taulaghiko thiḡa,
“Emunjoru Jisas Kraiḡ iye Giya.”
Thi utu na ḡgoreiyako, na thi
wovavwenyevwenyēḡa Loi Ramanda.

*Manjamanjalawamina i woya ḡgoreiya
ghitara*

¹² Wouna na valighareghareḡu, mbe
ḡgoreiya mbanake wolaghīye hu ghambughā
ghaliḡaḡu, othembe ya mebwagabwaga e
ghemi, e mbanake iyake weimi lemi mararu na
lemi mbarimbariri weya Loi na hu rovurighēghe
ghamithanavu ḡgoreiya gharighari valikaiwae
Loi kaero i vamoruḡi.

¹³ Hu vakatha ḡgoreiyako, kaiwae Loi iye
iya i kakaiwo e gharemina mbala valikaiwami

thanavuko iya amalaghiniye nuwaiyako hu tuthi na hu vakatha.

¹⁴ Mbanjake wolaghiye lemi kaiwo e tine, thava hu veliya ghamiutu o hu vedageghatuthi wenga,

¹⁵⁻¹⁶ na mbala thava ghamiwonjowe o lemi thari regha, iyemaenge ngoramiya Loi le ngamanjama thovuthovuye gharighari raraithari na wolaghiyeke e maranji. Totoko iya valikaiwae i giya yawaliko thovuye hu utuna wengi, na mbala manjamanjalawamina i woya e tinenji ngoreiya ghitaru i woya na i vakeke buruburuko. Thongo hu vakatha ngoreiyako, mbananiye Kraisi ne i njoghama ne ya warari, kaiwae lo rovurigheghe na lo kaiwo ma ya vakatha bwagabwaga e ghemi.

¹⁷ Ghemi lemi lonweghathina ngoreiya vowo hu vakavakatha weya Loi. Iya kaiwae othembe ne thi lingiya madibangu ngoreiya ravowovowo thi lingiya waen e vowo ghathetheghan vwatae, mbe ya warari enge, na weinguyangiya ghemi ra warari kaiwami.

¹⁸ Na ghemi tembe ngoreiyeva hu warari na i vakathanga ngoreiya ghino lo wararike.

Timoti na Epapiroditas utuninji

¹⁹ Thongo Giya Jisas le renuwana ngoreiye, nuwanguiya mbanja nasiye ya variya Timoti i ghaona e ghemi, na mbanja ne i njoghama, utunimi ne i vawararinango.

²⁰ Ya variye na i ghaona, kaiwae amalaghiniye le renuwana e ghareko ngoreiya ghino e gharenguke, na iye i rerenuwana laghiye moli ghamithalavu kaiwae.

²¹ Ghamauneko wolaghiye ma thi rerenuwana Jisas Krai le kaiwo kaiwae, mbe thiye enge ghanjimberegha lenji kaiwo kaiwae thi rerenuwana.

²² Ko ghemi kaero hu ghareghare Timoti le kaiwo utuniye, wo kaiwo na regha weingu Toto Thovuye kaiwae, ngoreiya thegha na ramae lenji vakatha.

²³ Nuwanguiya ne ya vamanya na ya variye i ghaona e ghemi, ko iviva wo ya vandene lo kotike na ya ghareghare budakai ne i yomara e ghino.

²⁴ Ya varemijje Giya iye ne i vugha kamwathi e ghino, na mbanja nasiye amba ya ghaona ya thuwenga.

²⁵ Ko ya renuwana nuwanguiya wo ya variya ghaghanda Epapiroditas na i njoghaona e ghemi. Iye lo valirakakaiwo na lo valiragagaithi Krai kaiwae, na iye lemi ravarivariye va i mena na i thalavungo.

²⁶ E ghareko nuwaiya moli i ghaona i thuwenga taulaghina ghemi. Ghare va i viri laghiye mbanja i lonjwevaiiya ghemi va hu lonjweya ghaghambwerako utuniye.

²⁷ Emunjoru va i ghambwera na mbalavama i mare, ko Loi va i ghareviri kaiwae na i vamoru. Ko ma mbe iyaenge, ghino tembe ngoreiyeva Loi i ghareviri kaiwangu, kaiwae thonjo va i mare, le mareko nuwathariniye mbalava i vatabo le ghambwerako nuwathariniye e ghino na ma i laghiye enge moli.

²⁸ Iya kaiwae nuwanguiya moli ya variye na i njoghaona e ghemi, na mbanja ne hu thuwe,

ne hu warari na ghino lo nuwatharike thava i laghiye.

²⁹ Weimi lemi warari Giya e idae hu kulavoreṅa. Gharighari ṅgoranjiyako hu yavwatata wanaṅgi,

³⁰ kaiwae iye i vatomwe moliya yawaliye na mbalavama i mare Krai le kaiwo kaiwae, na amalaghiniye nuwaiya thalavuko iya ghemi ma valikaiwami ne hu vakatha e ghino iye ne i vakatha.

3

Pol i botewoyathu bigibigike wolaghiye Krai kaiwae

¹ Lo bodaboda, lo utuutuke ghaghegovun iya e utuutuke thiyake: kaiwae hu yaku weya Giya, weimi lemi warari. Ma bigi regha e ghino thonḡo mbanake ya rorori e ghemi na tembe ya utuṅṅgiva budakaiya vama ya rori na ya utuṅṅa e ghemi. Thonḡo ya vakatha ṅgoreiyako, ne i thalavunḡa na thava hu vaidiya vuyowo.

² Hu njimbukikiṅḡa weṅgiya Jiu, thiye gharighari rarithari, thiye ṅgoranjiṅgiya mbughambugha, thiye thi tena riwanji.

³ Ko iyemaenḡe ghinda kaero ra wo kiteniyathu thanavuniye moli, Loi Une le vurigheḡe e tine ra kururuwe, iya Krai Jisas kaerova i vakathako weinda na kaero ra warariṅa, na ma ghinda ghandambereḡa la thovuye o ra woraweya mbe ghandambereḡa la vakatha ghamidi.

⁴ Thonḡo nuwanḡuiya, valikaiwanḡu enḡe ya vareminḡe lo thovuye na lo vakathanḡi. Thonḡo

regha i renuwaŋa ele righe na valikaiwae i varemijne vakatha ŋgoranjyako, ghino lo righe lemoyo moli na valikaiwanġu moli.

⁵ Va thi ghambingŋo na mbaŋa theghewa e tine ya wo kiteniyathu thanavuniye. Ghino Isirel loloniye regha, ya mena Benjamin gheuu tine, na orumburumbunġu Hibru gharighariniye moli. Va ya ghambu wagiyaweya Jiu lenji mbaro, kaiwae ghino Parisi lenji wabwi loloniye regha.

⁶ Mbaŋa va i vivako, ya munjeva ya vakavakatha Loi le kaiwo, ya giya vuyowo wenġiya ekelesiya. Thonġo gharighari thi tuthiya wothanavu Mosese le mbaro e tine, ghino lolo thovuye regha.

⁷ Ko bigibigiko thiyako va ya renuwaŋa yaŋaenġe lo ghamba thovuye, mbaŋake ya renuwaŋanġi thiye lo ghamba dobu, na Krai le kamwathi enġe ya ghambu.

⁸ Mbowo yaŋava, ya ghareghareko iyako iye bigi laghiye moli, na renuwaŋako wolaghiye gharerenuwaŋa ŋgoranjiya ghamba dobu. Kaiwae Krai Jisas wo Giya ghaghareghare i thovuye moli, i vakatha ya botewoyathunġiya bigibigike wolaghiye, na ghanjirerenuwaŋa e ghino ŋgoranjiya bigi bwagabwaga, mbala ya vanġwa Krai

⁹ na iye wou wo yaku na regha. Mbaŋake iyake ma ya rerenuwaŋa thonġo ya ghambughu Mosese le mbaro na mbala Loi i wovarumwarumwarunġo. Ko e mbaŋake iyake ya lonweghathigha Krai na Loi i wovarumwarumwarunġo. Thovuye molike iyake i menawe Loi lonweghathi kaiwae.

¹⁰ Nuwanḡuiya vara ya ghareghareya Kraiḡ. Kraiḡ va i thuweiru mare e tine na i vurigheghe, iya kaiwae nuwanḡuiya ya wo le vurighegheko na ya ghareghare. Nuwanḡuiya ya ghatana le viriko gheghad ne va mare ḡgoreiya amalaghiniye va i mare.

¹¹ Na lo loḡweghathike ḡgoreiye e ghino Loi ne i vanḡthuweirunḡo mare e tine.

Rukuruku moda kaiwae

¹² Ma yana Kraiḡ ghaghareghare kaero ya gharegharevao na ghino ḡgoranḡwa lolo thovuye moli. Ko iyemaenḡe ghino amba iyake ya rorovurigheghe, nuwanḡuiya ya wo Kraiḡ Jisas ghathanavu, ḡgoreiya amalaghiniye le renuwanḡa na i wonḡo.

¹³ Lo bodaboda, ma ya rerenuwanḡa na yana kaero ya mbanivao Kraiḡ ghathanavu. Ko iye-maenḡe the bigibigiya va ya vakathanḡi ma ya rerenuwanḡa kaiwanḡi, ko lo vurighegheke enḡe wolaghiye ya vatomwe na maranḡu mbe inawe vara budakaiya ina e ghamwanḡuko kaiwanḡi.

¹⁴ Iya kaiwae mbe ya ruku na i ghembe vara na va vutha elo rukuko gheghad, na va wo modoko. Modoko iyako iye Kraiḡ Jisas Loi i kulanḡowe na va vaidiya yawalinḡu moli e buruburu.

¹⁵ Thavala kaero lenḡi renuwanḡa i matuwo, taulaghike la renuwanḡa ḡgoreiya budakai kaero ma utunḡa. Ko thonḡo bigi regha kaiwae na lemi renuwanḡa mbe regha, Loi tembene i vamanḡa-manḡalana e ghemi.

¹⁶ Iyemaenḡe bigi laghiye regha, thanavuko thovuye iya kaero va ra woko ra vikiki wagiya.

17 Lo bodaboda, ghamithanavuna mbala ngoreiya ghino wothanavuke, na lemi ghamba ghaghayawo hu wo wenjiya gharighari thiye yawalinji ngoreiya yawaliko va hu thuweko weime.

18 Kaiwae gharighari lemoyo yawalinjiko i woranjiya thiye Krai le mare e kros vwatae utuniye thi thighiyawana. Kaero mbanja i ghanagha ya giya yanawamiya iyake, na e mbanake iyake weingu lo randa na mbowo ya giyava yanawami.

19 The bigiya riwanjiko i nanjo thi vakatha, na riwanjiko ngoreiya lenji loi. The thanavu i monjimonjina thiye lenji ghamba sirari, na mbe thi rerenuwanjaenge yambaneke bigibiginiye kaiwanji. Ne lenji ghambako, Loi ne ve mukuwongi.

20 Ko iyemaenge ghinda ghambanda moli ina e buruburu na ghinda mbe iyake ra roroggha weya la Ravamoru ne i njama e buruburu, iye ghanda Giya Jisas Krai.

21 Iye le vurigheghe e tine bigibigike wolaghiye ne i bigirawe e gheghe raberabe na i mbaronangi, na vurighegheko iyako e tine ghinda riwandake iya njavonjavovoniye na viriviriniyeke, ne i vivi na i tabo ririwo thovuye moli ngoreiya amalaghiniye riwae.

4

1 Lo bodaboda na valigharegharengu, ya gharethovunga, nuwanjiya moli ya thuwenga, na ghemi lo ghamba warari na lo ghamba sirari. Iya kaiwae hu ndeghathi vurigheghe weya Giya ngoreiya me lo utuutuko.

Thanavu valikaiwae ekelesiya thi vakatha utuninji

² Yuodiya na Sintike ya vavurigheghenanga na themighewona lemi renuwanā regha, kaiwae ghemi kaero hu yaku weya Giya.

³ Na lo valirakakaiwo thovuye moliya ghen, ya nango e ghen na u wa vo thalavunḡiya wanakauke theunyiwoke thiyake na mbe theunyiwoko vara ghamwanji regha. Vambe weinguyangi vara wo rovurigheghe na regha Toto Thovuye ghakaiwo kaiwae, na vambe weimaḡgiva Klement na worathalavuko wolaghiye, thiye idanji kaero Loi i rori yawali e ghabuk tine.

⁴ Mbanake wolaghiye hu warari kaiwae kaero hu yaku weya Giya. Na tembe yanava hu warari.

⁵ E ghamithanavuna mbe gharemi wenḡiya ghamune. Mbanā nasiye Giya ne i njoghama.

⁶ Thava hu rerenuwanā bigi regha kaiwae, ko thonḡo bigi regha i kwara e ghemi, hu nango weya Loi weiye lemi vata agowe.

⁷ Na mbala Loi le gharemalili, iya gharigharike lenji thimba e tine ma valikaiwae ra ghareghare le laghilaghiye, gharemi na lemi renuwanā i gana ghiliḡa, kaiwae hu yaku weya Kraiḡ Jisas.

⁸ Lo bodaboda, ya govuna lo utuutuke e utuutuke thiyake. Bigibigi thovuthovuye molinḡi na bigibigi e ghanjitarawa — thiye emunjoru molinḡi, thiye thi rumwaru, thiye ma thari regha ina wenḡi, thiye ra yavwatata wanangi — ghanjirerenuwanā i riyevanjara gharemina.

⁹ Thanavuko iyava ya vagharenḡako na hu ghareghare, thanavuko iya hu loḡweya ya utunā

na hu thuwe ya vakatha, thanavungiko thiyako hu vakatha valaŋa. Na gharemalili gha Loi i yaku e ghemi.

Pol i vata ago Pilipai lenji mwaewo kaiwae

¹⁰ Kaero hu vatoghanava renuwaŋa na hu thalavungo na hu variya riwanŋuke ghathalavu kaiwae, iyake kaiwae ya warari laghiye weya Giya. Ya ghareghare mbanake wolaghiye hu renuwanakikingo, ko kaiwae mava e ghakamwathi thovuye regha na hu variyewe.

¹¹ Ya utu ngoreiyako, ma gharerenuwaŋa ngoreiya kaiwae ma elo bigibigi, ko kaiwae kaero wothanavu ngoreiye, thebigi kaero ya vaidi mbe ya warari enge kaiwae.

¹² Othembe ma elo bigibigi o elo bigibigi, yakuyaku ngoreiyako ghaminae kaero ya ghareghare. Othembe ghanŋu lemoyo o bada i gharinŋo, othembe ya riyevanŋara o kokowanŋu, othembe budakai ne i yomara e ghino, ma ne ya nyivinyivi, mbema ya warari enge.

¹³ Krai i vavurighheghenŋo na le vurigheghe e tine bigibigike wolaghiye valikaiwanŋu enge.

¹⁴ Ko iyemaenŋe ghemi hu vakatha wagiyawe e ghino kaiwae hu thalavungo e wovuyowoke.

¹⁵ Ghemi Pilipai kaero hu ghareghare, mbanja va wombanja wareri e lemi valivanŋana Masedoniya e tine, mbananiye va ya vavagharenakai vara Toto Thovuye e ghemi, mava te ekelesiya wabwi reghava i giya mani o bigibigi e ghino wothalavu kaiwae, mbe ghemienŋe vara.

¹⁶ Mbanja va inanngu Tesalonaika na i vuyowo e ghino, hu variya wothalavu vavana e ghino, ma ranja mbe mbanjara enge.

¹⁷ Lemi renuwanja ne hunjaenge ya tamweya lemi thalavu, ko ya tamweya ghamithanavuko iyako mbe i mbuthumbuthu vara mbalavole Loi ve giya modami moli.

¹⁸ Bigibigike wolaghiye kaero ya vaidi na kaero ya riyevanjara. Kaero i mboromboro e ghino, kaiwae bigibigina va hu variye weya Epapiro-daitas kaero ya vaidingi. Thiyake ngoreiya vowo butiye thovuye hu giya weya Loi, na Loi iye i warari laghiye na i wovatha vowo ngoranjyako.

¹⁹ Lo Loi iye e bigibigike thovuthovuye wolaghiye veimaima na ndendewo, iya kaiwae thebigiya i kwara e ghemi, iye tene i vamboromborona e ghemi, kaiwae hu yaku weya Jisas Krais.

²⁰ Weya la Loi na Ramanda ra wovavwenyevwenyenja mbanjake wolaghiye ee ne i ndeko. Mbwana. Ngoreiye.

Pol i dage mwaewo

²¹ Hu giya lo mwaewo wenjiya Loi le gharighari regha na regha, thavala thi yaku weya Krais Jisas. Labodaboda iya ya yakuke weinguyangi thi mwaewo e ghemi.

²² Loi le gharigharike wolaghiye e valivanjake iyake thi mwaewo e ghemi, na thiye thi kaiwo Sisa ele ngolo thi mwaewo laghiye e ghemi.

²³ Ghanda Giya Jisas Krais ghare e ghemi.

Toto Thovuye Loi Ghalinae
Portions of the Holy Bible in the Sudest language of
Papua New Guinea
Buk Baibel long tok ples Sudest long Niugini

copyright © 2014 Wycliffe Bible Translators, Inc.

Language: Sudest

Dialect: Tagula

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-23

PDF generated using Haiola and XeLaTeX on 28 Dec 2024 from source files dated 31 Aug 2023

7a63d67b-b890-5db0-8880-b6fd64f3b62f